

SVEČANI KOLOKVIJUM U ČAST PROFESORA DR. ASIMA BILAJBEGOVIĆA

Tehnički univerzitet u Dresdenu je 9. jula 2015. godine organizirao svečani Kolokvijum u čast uvaženog profesora Dr. Asima Bilajbegovića, a povodom njegovog odlaska u mirovinu. Ova ugledna njemačka institucija visokog obrazovanja je posvetila organizaciji ovog događaja veliku pažnju. Prisustvovali su svi živi rektori i svi živi dekani Fakulteta za geoinformatiku TU Dresden, kao i brojni ugledni profesori i istraživači s TU Dresden, kao i iz različitih institucija visokog obrazovanja i istraživačkih institucija u Njemačkoj. Pored njemačkih uzvanika bili su prisutni profesori sa Geodetskog fakulteta Sveučilišta u Zagrebu, dekan prof. dr. Damir Medak i prof. dr. Željko Bačić. Sa Univerziteta u Sarajevu je ovoj svečanosti prisustvovala docentica dr. Medžida Mulić.



Slika 1: Rektor TU Dresden, Prof. Dr. Roland Stenzel uručuje poklon Profesoru Bilajbegoviću.

Program je vodio dekan Fakulteta za geoinformatiku Prof. Dr.-Ing. Wehmann, koji je izrazio dobrodošlicu i otvorio svečanost. Pozdravni govor održao je rektor TU Dresden, Prof. Dr.-Ing. habil. Roland Stenzel, a potom su govor održali Predsjednik Udruženja geodeta države Saksonije, Dipl.Ing. Axel Pohlmann, te predstavnik studentske organizacije, student geodezije. Govor o slavljeniku, Prof. Dr. Asimu Bilajbegoviću održao je Prof. Dr. Wehmann, izražavajući zahvalnost za 21 godinu rada na TU Dresden. Naglašen je veoma pozitivan i plodonosan doprinos slavljenika na istraživačkom i poslovnom planu, ali je kao centralni uspjeh profesora Dr. Bilajbegovića istaknut uspjeh u radu sa studentima TU Dresden.

Govor je praćen zanimljivom prezentacijom, koja je sadržavala mnogo slikovitih detalja iz privatnog i profesionalnog života slavljenika. Pokazane su mnoge živopisne fotografije iz ranog djetinjstva u Čaplama kod Sanskog Mosta, uspomene iz osnovne škole u Sanskom Mostu,

druženja i tokom geodetskih mjerenja ispred Tehničke geodetske škole u Sarajevu, studentskih dana u Zagrebu i Bonu. Također su zvanice bile u prilici vidjeti slike koje svjedoče o prijateljstvima s poznatim geodetima iz različitih perioda života uvaženog slavljenika, kao i prizore iz njegovog privatnog života.

Na svečanom kolokviju u čast Prof. Dr.-Ing. Bilajbegovića, održana su tri predavanja koje su upriličili nasljednici prof. Bilajbegovića na tri univerziteta na kojima je profesor tokom protekle četiri decenije svog profesionalnog angažmana radio. Predavanja su održana sljedećim redom:

1. Prof. Dr. Sc. Željko Bačić, Geodetski fakultet Sveučilišta u Zagrebu: „Ograničenja kinematičkih aplikacija GNSS permanentnih servisa u realnom vremenu.“
2. Prof. Dr.-Ing. Rüdiger Lehmann, Fakultet za geoinformacije TU Dresden: „Optimizacija kod pravila odlučivanja u geodeziji.“
3. Doc. Dr. Sc. Medžida Mulić, Odsjek za geodeziju Građevinskog fakulteta Univerziteta u Sarajevu: „Korelacija između GNSS TEC vrijednosti i zemljotresa koji su se desili u okolici Sarajeva u 2015. godini.“

Na kraju je slavljenik, uvaženi prof. Bilajbegović, održao privatan i veoma dirljiv završni govor, također praćen fotografijama i scenama iz života u četiri grada, locirana u tri evropske države, koje su bile važne stanice njegovog profesionalnog života. Prvo je govorio o Sarajevu, kojem je posvetio puno emocija. Potom je govorio o Bonnu, Zagrebu, te o Dresdenu, kulturnom centru Njemačke. Svi ovi gradovi, kao i ljudi s kojima je sarađivao, oblikovali su njegov uspješan profesionalni život i njegovu bogatu osobnost.



Slika 2: Dr. Yuksel Altiner predaje poklon odjela za Satelitsku geodeziju BKG Iz Franfurta, lijevo. Desno, neformalno druženje uz zakusku poslije počasnog kolokvija: Prof. Dr. Željko Bačić, Prof. Dr. Damir Medak, dekan Geodetskog fakulteta u Zagrebu, Dora-unuka Prof. Bilajbegovića i Doc. Dr. Medžida Mulić

Svečanost je završena dugim aplauzom koji je uslijedio nakon što je dekan uručio poklon TU Dresden i buket cvijeća. Aplauz je bio neobično dug za zajednicu znanstvenika. Svi gosti su ustali i nagradili slavljenika za njegov veoma emotivan završni govor. Bilo je veoma svečano, i iskreno govoreći, bila je čast i privilegija prisustvovati ovom svečanom Kolokviju u čast Asima Bilajbegovića, sina bosanskog, kojeg u evropskoj državi s najvišim standardima u geodetskoj profesiji današnjice, cijene mnogo više nego u njegovoj domovini.

Dokaz za iskaz u posljednjoj rečenici je činjenica da je uvaženi Prof. Dr. Sc. Asim Bilajbegović zamoljen da nastavi držati predavanja na TU Dresden, jer ima zvanje Profesor „Beamte“, što mu u Njemačkoj državi daje mogućnost da drži predavanja sve dok je živ i sve dok to on osobno želi.



Slika 3: Profesor Dr. Bilajbegović stoji ispred učesnika svečanog kolokvija koji na kraju svečanosti dugo apladiraju stojeći. Buket u ruci je poklon dekana Fakulteta za geoinformacije, Prof. Dr. Wehmann.

Profesor Dr. Asim Bilajbegović je tako prihvatio angažman na TU Dresden. Jednu sedmicu svakog mjeseca će provoditi u Dresdenu, zbog održavanja predavanja iz predmeta Fizikalna geodezija. Međutim, na Univerzitetu u Sarajevu odlučeno je da zbog činjenice da je postao umirovljenik, ne smije biti angažiran, usprkos njegove izražene velike želje da pomogne svojoj domovini čak više sad, kad napokon ima više slobodnog vremena. Predavanja na Univerzitetu u Sarajevu je tokom proteklih 17 godina Prof. Dr. Bilajbegović održavao u svoje slobodno vrijeme, tokom praznika ili odmora u Dresdenu, i tako sebi i svojoj obitelji uskratio mnoge zajedničke trenutke.

Svečani kolokvij u čast Prof. Dr. Sc. Asima Bilajbegovića završen je neformalnim druženjem. Bila je to prilika da mnogobrojni sudionici vode razgovore na teme, kako iz oblasti geodezije tako i šire.

Medžida Mulić